

耐菴文存

耐菴文存卷三

善化賀長齡耦庚署

序

吳仲昀詩序

道光癸卯夏仲昀同年旣晉黔臬將以八月入都展覲  
瀕行出其舊所爲詩索序於余而以其大父父及其兄  
諸集先之余曰是視三蘇更多一輩矣其能詩也宜哉  
夫其濡染服習於晨夕家庭之際淵源所漸性情亦將  
與之俱化詩稱穀似誠哉其多似也至於溪詣獨造直  
抒心得則有各自成家不相蹈襲者余蓋觀於仲昀之

服官行己而有以得仲昀之詩矣。昔蘇綽爲宇文氏作六條以訓有位。首曰清心而申之以心氣清和志意端靜。是所謂清者。匪直不貪貨賄云爾也。必也和其心而不撓於血氣之私。然後能順萬物之情而無所於拂。又必靜厥志而有以待天下之動。然後能盡萬物之理而無所於遺。然非清則無以爲和。非端亦無以爲靜也。余曩與仲昀同官於齊。越十餘載。又同官於黔。未嘗見其有疾言遽色也。其爲人也。慮澹而志正。雖在世局之中。而灑然有塵外之想。每當公廷集議。遇事輒有執持而出之。未嘗不蘊藉。乃其懇懇爲民。常若神周乎四境而

不能以須臾釋及其見於設施也則又夷然泊然絕無  
幾微瞋色之露見者或謂平平而余乃益深有意乎其  
爲人於虜其諸心氣清和志意端靜者非邪今觀其詩  
蓋自其少時則已斐然有作稱其家兒逮入官以後乃  
愈老愈樸但覺一往情淡使人不能釋手其目之所觸  
身之所歷凡有關於民生疾苦者往往累歎重噫長言  
永歎不啻婦子之自言其傷也間及邊防國計則援古  
剴今懲前毖後不啻室家之自謀其私也蓋躬其事則  
慮之也周歷其難則言之也痛其或事與願違則每怒  
焉自責自傷雖至無可如何而流連往復之餘時復不

能自己乃至中夏顛覆而無改其度卒乃復振亦若視  
爲固然此其意境爲何如序是亦變風變雅之遺也而  
優柔平中猶見先民之軌則焉非心和志靜而能然乎  
然則仲昀之詩卽仲昀之所以爲政也仲昀之政卽仲  
昀所以爲詩也仲昀黔中之詩曰漢官清夷人平余雖  
不敏請事斯語仲昀其助我式遄其歸余日望之矣

李徵生詩序

詩以道性情而性情莫真於骨肉是故風首關雎著王  
化所自始雅首鹿鳴四牡皇華而惓惓於將父將母序  
詩者以爲無公義非忠臣也無私恩非孝子也繼乃次  
以常棣其詩曰每有良朋烝也無戎言兄弟之厚於朋  
友也而又恐讀之者之疑於廢朋友也故遂次以伐木  
然而醢酒陳饋猶必速諸父速諸舅而終之曰兄弟無  
遠則誠懼夫以聲氣之愛奪其天性之親也聖人之旨  
深哉古之人服王事則思父母樂朋友則思兄弟蓋未  
有薄其所厚而能厚其所薄者也諸詩自漢魏以降體

格代變陳思靖節而外言詩者必首杜陵豈非以發乎  
性情而篤於骨肉哉今觀李君徵生之詩若操筆直吐  
者而沈鬱悱惻乃幾幾與杜陵肖豈真句摹而字擬之  
歟蓋其性情肫摯既有以爲詩之本而艱難困苦之摧  
折於外者又有以激發其志氣而益進於深醇故其見  
之於詩皆至性至情之不容已而非作而致也韓子云  
此真得詩意餘外徒繽紛自來孝弟忠信至患難貧賤  
而益卓絕而形於詩者亦遂以詣其至而因以昭垂天  
壤歷劫不壞是乃詩之爲教所以正人心厚風俗而天  
理民彝之在人心者不可泯沒也余故因序徵生之詩

而爲著詩之本如此云



逸老堂宗譜序

吾族世居浙省之鎮海縣。至高祖宏聲公以乾隆初年  
宦湖湘。遂家焉。始猶得故鄉音問。後遂間隔。至長齡通  
籍來京。乃又稍稍相聞。願以職守所羈。未獲一展先墓。  
至嘉慶十九年。熙齡弟成進士。乃得乞假歸。尋桑梓。蓋  
遠違故鄉者八十載矣。時適有修譜之舉。族之長者乃  
郵書委長齡爲序。竊惟古者重土著。雖至亂離。民無輕  
去其鄉。迄乎後世。輒多蕩析。卽余族之在鎮海者。亦散  
居各邑。而其徙他省者。亦必同此惓惓。而余祖宗之惓  
惓我後人者。其精神亦無地不相流通。卽長齡兄弟之

忝竊科名何莫非庇蔭之所及也乃通籍十餘載猶未  
得拜謁祖墓其獲咎先人者不旣多哉然而宗子之法  
祠堂之規義田義學之制族之長者已相與講明而修  
舉之則又長齡所湊幸而亟欲覩其成者也是爲序

送唐敬楷之江南序

敬楷先生吾鄉之望也。蓋自其執法多臺出而府道監司勁直自將絕無撓屈。擬之聖門諸賢如曾子子思孟子皆以剛大之氣肩斯道之傳。先生殆其庶幾。雖所如不合而得民甚深。所至則攀戀謳思。去後而俎豆馨香。其視一時之赫奕得失何如也。且當時大吏亦頗知重公。如粵西平獠之役。制府盧敏肅公以公首列薦牘。至有儒臣經濟之稱。而彝好之公不敵摘挑之口。所至率不過一年淹。而先生終不少挫。竟以此不得久安其位而內召矣。先生少隨任吳中。日手一編俯讀仰思。紛華

靡麗之習泊如也。及踐歷中外，益勵冰檠之操，愈有以助其清明之氣。接人應事，到眼卽了。連丁內外艱，廬墓泰山者六載，茹苦食澹，有人世所絕難堪者，而所性定矣。此先生忠孝大節，生平未嘗以語人，而誠不可掩。自有以愜乎天下人之心。先生之內用也。鄉之人士，無論識與不識，僉曰：益放我公歸，使吾輩得所矜式。及先生之歸年已七十矣。士之有志者，不遠數百里咸來請業。適余亦罷歸，尤喜得商量舊學。以庶幾聞道而寡過。乃先生以兩世先塋皆在岱麓，非移家江南則瞻望殆絕。而東南之行不可挽矣。則庶幾數年之後大耋歸來。

猶得斷疑諏是。如今日之面稽罔勑乎。是所冀倖而不敢必者也。先生嘗誦子輿氏必有事焉。數語密自繩督。學案小識一十五卷。息邪距詖。一惟孔孟程朱是遵。不獨爲我。

朝不可少之書。將來學者將於此取正焉。先生自言卷中人人皆經稱量過。自信實無銖黍之差。其審慎何如也。此行也。必有能讀是書者。吾爲斯道幸矣。

尙節堂勸捐序

道光十有六年余奉

天子命撫黔入其境民多菜色衣又窶空甚者不蔽體  
嘻何貧也抵省則節坊貞碣林立道旁乃歎天地正氣  
初不以所處之艱易爲虧全正惟處艱而能不虧則樹  
立愈奇而愈可貴尙雖然能保其舉不虧乎卽不虧矣  
而目擊其艱而無以恤之可乎余嘗謂鰥寡孤獨皆天  
民之窮而無告者也而甫離母腹卽無以自存與夫年  
少而失所天者尤爲無告而可憫夫呱呱者之不能言  
也夫人而憐之黔固育嬰有堂矣乃若青年喪夫形單

影隻卽夫家尙堪存活。或母族有可依賴。其苦衷鬱志已難言矣。至於環顧一無可恃。而又有老者之待養。弱者之待哺。交責於一身。雖健男子猶難爲謀。況於女子。甚或門祚衰薄。孑然無依。卽一稚孺皆得欺而侮之。當此之時。將背而去。而此心難背。將守而歿。而此心難守。誰知於是一往不顧。相從地下者有之矣。而徘徊濡忍。不能自持者。蓋亦未嘗無也。一生名節祇爭呼吸。將以一髮挽千鈞。則所賴於鄉鄰。任鄙之維護者。其可須臾緩哉。抑余又有慨焉。文王之時。人敦節義。特恐垂老無夫者之失所養耳。今則保節爲先。幼孀尤在所急。故於

斯堂之建顏曰尙節意固各有所重也嗟夫佛家以此世界爲跛陷而儒者則云世界雖有跛陷吾心不可使有跛陷黔民如是之貧也黔俗如是之美也若更得所存恤行見懷清之臺不勝築柏舟之詩不勝採微獨吾心不留跛陷且胥此世界而圓滿之矣豈非東平所謂爲善最樂者哉是舉也余與方伯鍾齋慶君各捐廉五百兩鄉圃任觀察曉田石署守各捐二百兩又籌款四千兩爲之倡始不逾月紳耆士民報捐數千兩蓋正氣之常伸而人心之好善於此已見一斑余故樂爲之序以導其同歸於善庶集眾善以成大善云



恤嫠會勸捐序

世上苦人多矣而無可告訴者無如失乳之嬰與少寡之婦余嘗以育嬰恤嫠二事爲善舉中所尤切尤急而不可須臾置者顧育嬰一事委曲繁重屢議未果若恤嫠則未若是之難也而可不舉乎按六經中婦人之以節著者惟衛其姜紀叔姬宋其姬三人至秦而懷清築臺乃後世建坊旌表所由始然則猶未數數然也蓋三代之時孝重於節所求於婦者惟能事舅姑之爲重記云子甚宜其妻父母不悅出如是則節不得不輕自伊川先生有餓殍事小失節事大之說而後婦節之重與

臣節等見於史者殆不可勝紀至我

朝而綽楔加恩矜寵尤甚婦人女子沐浴

聖化雖窮鄉僻壤無不爭自奮厲以節相高貞烈之風  
於是爲極盛也然而空房影誰與扶持冷竈寒煙誰  
爲保護或爲強暴所凌或爲旁觀奪志蓋有欲守而不  
能旣守而不終者於是翁姑無與爲養而門祚衰遺雖  
無與爲哺而宗祀斬要其本心難昧未嘗不悔痛於事  
後而已自喪其生而失節之嗟可勝傷悼至若含辛茹  
苦之灰靡它或撫孤以有成或奉姑而盡孝迨其後嗣  
每多聞人如我

朝之睢陽湯文正關中李二曲理學名儒爲世模楷。至  
今稱誦不衰。猶推原於母節之所致。明德有後天道固  
然。然方其瑩瑩一室。存亡幾難自保。非其守身之潔矢  
志之堅。卽安能流徽彤管而食報於子孫也哉。夫比閭  
族黨皆有相賙相救之誼。況節義爲人神所同欽。而顧  
不爲之所。一任其困苦艱難。徒作旁觀之太息。反之吾  
心而不安。卽揆之天理而不順。有心世道者能辭其責  
歟。所願同志諸君子互相勸勉。量力捐輸。俟有成數。熟  
商妥辦。務使欲守而不能者得以遂其守。旣守而不終  
者得以完所守。能守而貧不自存者得以益堅其守。以

扶植名義導揚善氣或於皴陷世界不無小補云

周太母七十壽序

道光辛卯夏長齡謁祖塋於善化之東南鄉涉塗踰三十里白石鱗次不窪不欹雖值陰雨若履坦途問誰之脩則羣然稱頌曰此善邑周太母李太宜人之功德也長齡聞而憬然蓋周與長齡家爲世姻自戒欺先生以申韓起家品方而學粹大吏之來吾楚者罔不式閭奉教欽爲指南逮

誥封奉直大夫耐泉先生益宏其業家日以起於是蘅吾別駕易幕而宦佐郡章門騰茂蜚英蔚爲華廡固由累世載德積厚而流而仰承俯殖以引之勿替者則皆

太宜人隻身措拄勤施密運於無形之中者而淺見者  
或未之察也太宜人係出安徽之婺源生而淑慎在家  
卽以孝聞逮歸於周事舅姑相夫子教子課孫無一不  
應禮經而勤儉性成雖席豐履厚而不改其寒素之操  
褰布荆釵數十年如一日也在詩采蘋采蘋所以致美  
於諸侯夫人大夫妻者亦唯是夙夜在公自力於筐筥  
錡釜之間以是爲克修婦順耳家與國豈有二道哉夫  
約已則有餘裕人則不足而我太宜人勤身自持寸帛  
銖金絕無纖毫妄費及至聞義若渴則孜孜爲之至老  
不倦如同善堂之建首捐數百金爲之倡辛卯水災流

民載道振救不遺餘力蓋其仁心爲質有觸斯形平時之愛惜物力不敢濫有所糜正其一體痼瘵不敢稍有所惜也騶虞麟趾之忠厚孰非采繫采蘋之勤儉所由馴致其道哉甲午三月上巳爲太宜人七十壽辰諸姻友欲以一言侑觴而屬之長齡謹按武王之帶銘曰恭則壽太宜人之勤儉太宜人之恭也孔子之訓曰仁者壽太宜人之忠孝太宜人之仁也旣恭且仁壽將無量以是介祉不較之王母青鳥虛誕之詞爲信而有徵哉

耐菴文存卷四

善化賀長齡耦庚著

書後

桂林陳文恭公德配楊夫人課孫圖書後

國朝理學名臣後先相望而世德繩承累葉彌盛者前  
惟安溪李文貞公後則桂林陳文恭公至今搢紳間稱  
說舊德名門必以兩家爲鼎族而文恭公之五世孫蓮  
史方伯復繼錢湘舲閣學褒然稱三元爲我

朝二百年來科名僅見之盛事則公之遺澤尤長也方  
伯之兄敦臣作令黔中每一接見輒善氣迎人賢者子



孫自異俗吏一日手捧公配楊夫人課孫圖再拜請題  
余肅容諦觀乃歎鍾祥篤慶蓋內助與有力焉而益以  
見公之修身以齊其家者其勗歟尤在人所不見之地  
及其發於事業被於生民所至輒孚施之立應顯融懿  
懌或以儒者別有吏才而不知特自門內而推暨之巨  
於庠可易言哉夫君子之道造端夫婦家人之義歸本  
反身何者大廷易飾而在席難欺慎獨之學於斯爲至  
卽風化之基由茲託始也今觀斯圖貴而能勤富而能  
儉不以愛而弛其威嚴不以幼而寬其繩督王母而兼  
師保之任閨闈而有詩禮之風微夫人之賢無以相公

微公之賢又曷克刑于夫人若是哉宜乎敷歷四國聲  
教翕然而積厚流光且引之勿替也雖然再實之木其  
根必傷千葉之花厥子不茂公之德施於數世矣而天  
復申之以曠絕難覲之科名俾極其焜耀斯亦菁華欲  
竭之時也洩之也盛則非大其蓄而厚其藏將何以繼  
母亦惟是端本善則體公之心紹公之學培之又培以  
縣公之澤於有永則撫斯圖也必將有提命如閭而繼  
述恐後者矣余旣與敦臣兄弟交又夙慕仰公之樸學  
實政未能勉跂萬一幸得綴名圖末輒用蠡測推本公  
治行之所自兼勸敦臣兄弟且以詔其後之人

芸館集仙圖書後

芸館集仙圖者長白英煦齋相國師圖其癸丑同館二十三人時在乾隆甲寅之歲後二十年新城陳鍾溪少空今吳縣潘芝軒相國兩夫子又倩友人各臨一圖而新城師爲之記時嘉慶十有八年也今新城師喆嗣服耔大令捧檄來湘出圖索題距作圖時已二十二年矣距新城師之歿亦十數年矣圖中之人存歿升沈蓋不一狀而因緣文字切磋道義則長齡於茲圖不能無倦倦也長齡爲諸生時何丈茂軒狄丈次公實相繼來典學歲科兩試輒蒙甄拔暨入翰林長白吳縣新城三鉅

公迭掌翰苑提唱風雅海內人士被其容接者若登龍門然而長齡皆得以爲師時則侍郎周公石芳李公春湖學士蔡丈生甫太守吳丈玉松皆以翰林宿老爲文章宗匠漕帥魏公愛軒時在諫垣論奏侃侃持大體長齡以同館晚進猶得握衣末座承顏接辭今大司寇戴公金溪方官比部郎與長齡寓邸鄰接暇輒踏月過從意氣尤相洽也愛軒公之弟麗泉中丞玉松丈之子藹人學士觀察朱丈芝圃之弟勳楣觀察皆與長齡爲同年猶記芝圃丈以福州守展覲北來一日酒酣爲言招降海賊狀虬髯戟張精采飛越赫赫若前日事藹人勳

楣詩酒唱和輒就玉松丈點定之春湖公亦降輩行爲吟壇執牛耳其時服耜大令與吳縣師令嗣功甫舍人猶未冠也而風采雋出已能傾其坐人蓋吾師之明德遠矣邂逅訂交則有李丈諡原時以復官來京師傾蓋一面真氣盎然照人肝膽也迨長齡視學山右而麗泉宰太平循卓有聲駸駸乎與愛軒公爭烈矣出守南昌則石芳公爲學使金溪公爲提刑復得奉清塵陪曲宴及官江蘇而吳縣師與玉松喬梓方優游泉石間長齡簿領之餘步履往來不異春明聚首時也愛軒公  
七省漕事值河道中梗創舉海運長齡亦預參末議效

指臂之用自念在館將廿年其先乎我與後乎我者性情學問各各不同而無不有以益我焉乃獨於癸丑諸耆舊若重有綢繆者亦不知其何以然也今者麗泉晉閩撫金溪公長秋曹而吳縣師且正位台鼎餘霞滿天如日方中蓋乾隆中年當我

國家文明極盛之會其選入中秘者皆清華上品文章事業於斯爲盛淵源所漸卽其子若弟亦皆卓然有以自見於世且以迪前人光雖閱今五十餘年不無華屋山邱之感而落落數公參錯天下

朝廷實倚以爲重則斯圖也雖百世之下猶將心焉嚮

往之豈徒紀一時之盛爲科名佳話云爾哉今吳縣師  
方以天下爲已任而功甫舍人脩然塵外亦各其意趣  
所寄爾服耔旣有意民社矣必將異乎俗吏之爲以自  
致於青雲之上雖風塵猶蓬閭也謹卽圖中之人及其  
子弟與長齡有舊者追憶梗概臚而筆之以見  
國家設科良非偶然而爲之後者尤不可不以自勉服  
耔其必有味乎余言矣

花瑞圖記書後

花瑞圖記者吳門王氏之所圖而吾師芝軒相國記之者也先是壬辰癸巳閒王氏園中芍藥盛開有金帶圍三枝王氏繪圖賦詩以待徵應會吾師登揆席王氏遂以圖歸之而吾師抑然自下謂何敢遠比韓魏公而以花瑞期諸後賢且謂區區爵位不足云而德行勲業爲可貴旨哉言也於虜此卽天之所以瑞吾師也乎夫瑞非爵位之所能致也而天乃於爵位加崇之日而示之瑞人之見之者以爲爵位致之也而不知所以致此爵位者德行勲業也天喜其德行勲業之足以重其爵位



也。又喜其爵位之崇，而德行勲業將因之以大發抒也。而於是乎瑞之天，其以吾師繼魏公之後乎？魏公之徵此瑞也，在帥淮南之日，其時年甫逾壯，天下已稱爲韓公，偉猷英略，一時無與倫比。夫人而知此花之爲魏公瑞矣。迨後嘉祐治平閒，再洩大策，以奠社稷，不動聲色，措天下於泰山之安，而後知天之瑞魏公者，其意蓋遠且大也。否則雖有此瑞，而異時事業無以發皇而揚詡之，安能聲稱到今？使後之論者猶指其瑞而屬之魏公也哉？吾師以弱冠魁天下，不數歲而躋顯列，其年其位，與其風望之夙成，蓋又一魏公也。今者晉秩台階，而天

乃以瑞魏公者瑞吾師則吾師之德行勲業亦既足以  
兆之矣然而委寄方殷負荷益重中外之所仰望其事  
正未有涯意天之所期吾師者必能心魏公之心事魏  
公之事而後瑞以魏公之瑞也於虜豈偶然也哉且夫  
賢者之謀人國也非僅及身而已必將扶植善類聚之  
朝廷使其更互迭進而後氣脈悠長太平於以可久如  
陳暘叔王禹玉介甫輩皆當日淮南坐上客耳其後咸  
繼魏公執國政號稱治安此百年樹人計也吾師不侈  
一時之瑞而惓惓於後來之才哲蓋其意思深長舉天  
下之德行勲業皆在吾函容並包之中卽魏公之用心

亦豈異是乎。方將咏菁莪棫樸之詩。賡梧桐華萼之句。疏條布葉。庇我蒼生。一瑞集而萬瑞從之。百年之後。又將以魏公之瑞爲吾師瑞矣。然則吾師之所以瑞我國家者。庸有量乎。

吳荷屋中丞筠清消暑第四圖書後

聖門論事君以患得患失爲鄙夫至孟子乃直搜其隱曰熱中然後知得失交戰皆熱之一念爲之此荷屋中丞筠清消暑圖所由作也中丞自嘉慶己未登朝歷職中外迄今四十年所矣時凡幾更地凡幾易官凡幾遷圖亦凡幾製而筠清消暑如故也嘻冷矣雖然聖人之於天下未嘗一刻冷也終其身栖栖皇皇雖心知其不可而爲之不倦其告學者必諄復於仁而唯恐其心之稍冷至論事君則致戒於患得患失而又唯恐其稍熱者何也蓋必冷其所當冷而後能熱其所當熱也且夫

冷熱亦何常之有。有似熱而實冷者。有似冷而實熱者。中丞之歷官也。由翰林而御史。而刑曹。而樞直。皆聯一時清要之選。由是而臬而藩。而開府。可謂熱矣。而翛然塵外者。其冷自若也。乃其歷官所至。周諮利弊。纖悉無遺。勤勤然懇懇然。惟懼一物之失所。一事之未當。若疾痛之在身。而不能以須臾置。又何其熱也。我

朝陳文恭公。以熱腸卽爲仁。長齡深味其言。以爲深得聖人之心。諸葛武侯淡泊明志。長齡謂卽集思廣益。鞠躬盡瘁之本然。則其冷也。乃其所以熱也歟。抑觀圖中之貌。自少而壯。而老。駸駸乎非復昔時面目矣。然而真

我自枉也。天下熱者不可久而冷者可久也。披此圖又  
不禁悠然意遠矣。

歙縣鮑氏慈孝圖書後

宋末盜起處士鮑宗巖挈其子子壽避亂歙之龍山

爲盜所得父子爭死盜兩釋之見宋史孝義傳

於虜余觀鮑氏慈孝圖而歎南宋之亡不亡於孤兒寡婦之手而亡於高宗貪天位不思復仇以反其父兄之一念何則鮑氏父子山中細民耳而爭死併命遂足以格兇頑者其心純也當其時父惟知欲脫其子子惟知欲脫其父此外更無餘念也夫純氣可以通神明而況於人乎彼高宗者非不念其父兄也特以愛父兄之念不敵其貪天位之念則其心已雜而不純雜則理不足以勝私又且寢微寢消而私意爲之主矣夫以匹夫一

念之純猶足扶植綱常轉移醜類況據南面之尊而惟私意之徇至覲顏喪心忘其不共戴天之恥則人亦孰不各爲其私而誰與赴公家之急者故雖勉支江左百餘年之殘局而大義未伸國勢終以不振審乎此而尙何疑於鮑氏之興乎思其所以興得不瞿然於其所以敗乎孔子與曾子言孝而首引無念爾祖聿修厥德之詩以申之鮑氏子孫而無忘先世艱難也尙其聿修厥德哉



雙節傳書後

爲鎮甯州拔貢生宋光銘作

周子云家之離必起於婦人吾謂家之興亦必繇於婦人蓋男子有事四方而婦人則坐鎮一室其關係於家之興廢者與男子竝而有時或過之每見人家夫男中道夭折門庭索然老者既老而無以養幼者方幼而無以長其勢岌岌不可終日又或外侮疊來內難繼作而如綫一脈垂絕復續卒能大昌其後者則惟節婦之故夫節婦之爲此甚難而若忘其難者彼誠有所大不忍於中故食蓼茹荼習焉而不知其苦以爲不如是則其心不安蓋惟無所爲而爲是以其心純一粹白有以格

幽明而食厚報厥功直與存亡繼絕等此聖人所以特  
隆其禮於妃匹之際而姑之於婦夫之於妻皆重爲之  
服制以爲託之者重則禮之者不得不嚴若宋氏兩節  
婦其知此義矣宋蓋詩書之家兩節婦皆士族薰陶濡  
深積漸使然故雖屢瀕於危而孝廉拔萃鬱然蔚起繇  
是以觀節孝乃詩書之澤而詩書又節孝之貽宋生其  
無忘先世艱難益茂乃學益敦乃行以正其家而世其  
德則所以顯揚者將未有艾而豈徒詠烈誦芬云爾哉

李烈女節略書後

黔西烈女李氏幼許字貴筑周頤嘉慶丙戌頤隨侍父石藩大令於河南輝縣任越八年病歿計聞女不食其母之娣孀也樓居奉佛謂之曰益從我誦經乎女諾之以不食甘旨不下樓自誓俄而其母惑於媒氏之言將奪其志女遂潛於佛前持翦自祝其髮老婢葛氏見而強奪之女急刺頸深寸許血溢襟袖逾二日歿臨歿謂母曰兒不肖不能終事吾母願吾母勿以兒爲念此道光甲午九月初三日事也距其生二十有三年矣其葬也在黔西拉里橋女曾大父大司馬恭勤公之墓側石

藩大令哀其志出所著節略示余并擬移其櫬以附于  
子頌之墓余曰不可周禮媒氏禁遷葬與嫁殤蓋慮有  
此也然則何以不沒吾婦乎余曰其事良不可無述而  
其義尤不可以不辨世以室女未婚守節及其身殉者  
爲例所弗旌遂援曾子問女未廟見而死不遷於祖不  
祔於皇姑歸葬於女氏之黨之文以相難如震川歸氏  
之貞女論至訾爲悖禮甚哉其泥於文而不求乎理之  
妄也句山陳星齋旣著論以闢之矣而辨之精而義之  
確則高安朱文端公之書山西岢縣賀烈女傳後有足  
述者文端以婚禮之最可疑無如三月廟見左傳鄭公

子忽如陳逆婦陳鍼子曰先配後祖是不爲夫婦夫先  
祖而後配是未婚卽廟見矣或云鍼子所謂祖乃告而  
親迎非廟見也信斯說也旣以親迎告矣婦入而遲之  
三月而後見事必如生之義固如是乎解者曰三月之  
內恐有可去之事故不廟見然則廟見矣雖有可去之  
事將不去乎竊意春秋於親迎書至至者以婦之至告  
諸廟而見之也是至日廟見之明證也婚三月矣擇日  
而祭於禰亦云廟者前以新婦見至是乃以主婦見也  
禮曰若舅姑旣沒則婦入三月乃奠菜註云如舅姑存  
時盥饋特豚於室也又云此謂適婦供養統於適也然

則眾婦與適婦之舅姑在者將終不成婦乎未三月而  
灰者歸葬乎否乎卽就曾子問言之親迎在途而壻之  
父母灰改服布深衣以趨喪釋云若冢婦則主喪拜賓  
如以未爲婦也安用趨喪乎又安得而爲之主乎又曰  
取女有吉日而女灰壻齊衰而弔夫灰亦如之夫婦人  
不出疆而弔今以室中處子於素不覲面之人斬衰而  
哭不謂之夫婦可乎或疑詩書史傳所紀未聞有此是  
殆古人所不爲歟抑有之而載筆者擯弗錄歟曰正史  
以格於令式而缺焉未備其他雜見於傳記小說則儒  
者所不道也然易詩有之矣易歸妹之上六曰女承筐

無實士刲羊無血朱子本義謂約婚而不終者夫不終  
矣而猶稱歸儼然婦贅於舅姑也而婦之義則虛矣柏  
舟詩曰髧彼兩髦實維我儀兩髦者剪髮垂眉本童子  
飾成人弗去示人子事親已長不忘孺慕也詩蓋曰彼  
垂髧者孰謂非我匹乎小序謂衛世子共伯妻作此以  
自誓豈有世子妻寡而可奪而嫁者乎況考史記衛世  
家共伯之歿已立爲君矣序與史記俱不足信要之此  
詩爲節女誓志而作無疑矣且古今禮俗固有未可概  
論者古者風俗淳厚所重在禮今世人情反覆所重在  
信非謂信行而禮可廢不使不信者藉口於禮之未備

也律載已報書及有私約而悔者笞別聘者改正豈不以一言許諾夫婦之倫已定而終身不可易夫是以貧富貴賤之中更以及流離瑣尾兩不相知至於愆期而卒不敢他乎夫生而悔者嚴其罰歿而二者靳其旌國家立制夫豈苛刻於節女其謂此非常之事聽有志者之自爲若樹之風聲將有作而致其情者矣夫國家無旌法則無所冀幸詩書隱其文則無所效法無所冀幸效法而爲之者發乎至情而不容自己者也予長女許嫁李氏既有吉期而壻歿女守節十有三年而歿矢志之初有引禮經難之者曰吾知非禮吾志不可強也



將歿曰勿請旌本無可旌也吾女自以爲不合禮而不能強其志之所不爲若賀氏者則不知有所謂禮而直率其性之所欲爲而已斯所謂無所冀幸效法而發乎情之所不容自己者乎文端此論洵深得禮意律意之精微而所云不合於禮者特其女自抑之辭耳善乎藪山劉念臺之言曰禮也者性之流行也斯須而去禮卽斯須而滅性矣李烈女甫聞夫計卽不食繼以可遂其志卽誓不下樓卒乃迫於其母遂以一歿自完是直率其性之所欲爲而適協乎禮之不可易所謂不學而能一誠自將者非耶顧賀之歿則以欲爲夫立後而不可

得遂一夙以畢其志而其婢安氏實成之并以身殉李則欲完其節而不可得至爲婢所持而適以速之歿所遇微有不同要之二女之義烈初不以人爲前卻也衷於一是而已余職司風化其事旣信而有徵誠不可聽其湮沒而特爲詳著文端之論者蓋欲天下咸曉然於大義之不可假易而此舉之非過庶不惑於俗說而得以各卽乎人心之所安匪直爲李烈女一人志也

嘉善徐君神道碑銘書後

徐君理齋余世姻也。余居憂時，理齋嘗過從，爲言曾大父正安州吏目君教民，擣蠹諸善政，余心識之。及撫黔州人以其治蹟來上，爲請於

朝，得祀名宦如例。距其沒百餘年矣，而正安綢之名聞天下。州人以其絲市羨金，供君祀歲時，絃歌而薦之。君固依然未沒也。人生不過數十寒暑，卽善攝生亦不過百年而止。而徐君顧至今存，且將久而益大。將毋自攝其生，與攝眾生之生者，其大小遠近，意量固不侔邪？萬物之生，受形於月，秉精於日，月有盈闕而日無盈闕，盈

闕者形也而精神之流行則不與形爲盈闕也人之精神本與萬物同流官其地者卽山川草木無不與其精神相感召有能興其利者則山川草木亦爲之貢其菁華而與之俱生如徐君所爲殆非徒自攝其生而與眾生俱生者歟稷之養契之教大小雖殊其爲功於天下後世則一也碑稱君誠篤有幹才才生於誠者也州人之思君越百餘年猶周人之思召公也一誠而已君浙產以孫某貴追贈君五品階理齋今籍善化有吏才一試於江西輒歸養不出而時時以醫術活其鄉之人殆亦不徒自攝其生者歟今其弟鳳藻旣登吾鄉賢書從

姪以煒亦隸遵義學官弟子員吏目君之澤長矣庸第  
攝一方之生已哉

題跋

題但太史子駿歸省圖

子駿太史雲湖觀察之長君也英年績學早陟清華駸駸乎騰上有日矣而太史瞻望白雲方進思退爰於道光庚子秋假旋荆南爲觀察公壽時葵堂吳恭人方奉繼王母饒太恭人里居遂返黔中循陔潔養並爲觀察公代脩子職焉鄉里見者無不榮之以爲人爵如斯其可貴也抑知天爵脩而人爵從之其榮也蓋以天不以人歟觀察曩官吾省有惠政而饒太恭人好行其德於鄉淵源所漸其來有自今觀太史器局淵邃接其言能

而者之不  
知大義尤篤於倫理吾與觀察蹤蹟疏闊未悉其世德  
之詳而以所見聞揆之於理則夫疊笏重纓方興未艾  
蓋非一日之積以德則脩於人而天應之以爵則脩其  
天而人應之矣天邪人邪果孰爲榮邪太史出圖屬題  
輒書其意以勸之并系以詩有雛者鳳趨庭羽狂有哺  
者烏翔林口瘖昔也含飴今也舞綵春有重暉心無寸  
改雲出於山而雨其山被潤澤兮大豐美蓋仍一氣之  
往還

題周小湖太守山館評梅圖

昔宋廣平沈於下僚以梅花賦見知於直指蘇味道薦之於朝爲唐賢相後之論者輒奇其遇吾謂以廣平之賢當時卽不遇味道終亦必相卽不相廣平亦不以此貶賢梅花特其寫照耳小湖之爲此圖其時尚未遇也而蕭疏閒遠早已隔斷紅塵不攜廣平之詞自得逋仙之趣儻所謂澹泊明志者非邪其後入翰林轉御史視學中州粵西出守銅仁駸駸嚮用矣而小湖依然聿素也中更挫折乃至降而夷於丞倖疇昔同館諸人且袞袞陟清要爲鉅僚自恆情視之幾不可一朝居而小湖



絕無幾微見於意色。今且領袖諸郡。敬官揚職。弗懈益虔。通省吏民欣欣焉。若孺子之歸慈母。幸其來而又懼其去也。語云。宰相時來則爲之異日。和羹事業。吾不得而知。而今則旣知之矣。夫其順事恕施。平情接物。不苟同。不矯異。不爲一身之計。而予眾人以安。不爲旦夕之謀。而規久遠之利。誠意懇到。善氣迎人。和羹之道。何以加茲。然則山館閒評之日。其意固已遠矣。豈待試之職事而後見哉。余愧非味道。而小湖則今之廣平也。特剛柔各善其用。曰。姚宋庸有異道乎。欲知小湖。但觀之梅可也。

顓周漁璜宮詹桐埜書屋圖遺照

先生康熙間人  
圖額爲京江張

素存相  
國書

安溪李文貞有言作事近厚便是古人不任時代季孟  
讀此輒令人不敢自菲薄漳浦黃忠端公往往詔戒後  
生親近先輩謂於身心大有警省詎非以其厚歟元相  
安重十餘歲時每朝退輒與老成人談處其母浚爲大  
器今或喜少侮老風俗安得不薄先生去今百數十年  
而端厚氣象猶可於圖中得之母亦道泰時淳上之所  
以教下之所以學猶有古昔樸茂之遺則謂時無季孟  
者容有未盡然歟觀介眉集所序兢兢焉惟隕墜太翁

之教是懼厥後皇華四出所至皆揚職敬官一無辱命而且兼資文武爲憲萬邦非篤於本行而能然歟余生也晚不及追隨

國初諸老猥以庸虛忝職宣撫恐無以敦厲風化爲朝廷羞猶幸式瞻儀刑識所祈嚮旣以自勵并爲先生後嗣勛庶幾厚德長流使新出晚生得資矜式不致愈趨愈薄則茲圖之久而獲存實於世道人心裨益非淺庸第一鄉一家之私幸歟

紀略

兩淮都轉平羅俞君言行紀略

兩淮都轉平羅俞君之卒也。今兩湖總制林公旣銘其幽矣。顧余與君交最久。知君最深。痛君之未竟。厥用卽其志行。亦容有未盡。暴白者。儻終竟湮沒。則後死者其奚所逃責。乃就所知見。而銓敘之以補志所未備云。君淡於榮利。而篤於倫理。嚴於自治。而恕於使人。曲達人情。事變故所至咸理。而去後恆見思。余始官吳中。君爲長洲令。旋擢督糧。丞總辦海運。未幾以憂去。余旣官金陵。君以海運甄敘得常州守。調江甯。余實引以爲助。蓋

後先其事者數年。凡用人行政，必以諮君。數言輒定。訖事，罔不如所慮。願君之裨益身心，使余久而愈思，思而不可復得者，尤非人所能知也。君居官謹恪，卽胥吏白事，不衣冠不見也。盛暑，讞獄危服坐堂，皇汗浹竟日。異時，君方有所推鞠，遽忽作舉體震掉，事未竟不止也。荆溪任庶常泰爲余言：君始至荆溪，攔輿訴者百十輩。閱年餘，前譟者又易名控君。一見卽識之，羣驚爲神。君去長洲日，元和石太史韞玉率士民以實政在民四字顏其堂，其憂歸也。今遵義守平君翰方同辦海運事，爲書楹帖贈之云：至性至情得天者，厚實心實政，感人也。

淡當時謂無湍美於虐君何以得此於士民僚友哉君  
於官中所入雖少必別貯之曰此官銀也官錢也吾不  
敢以私至遇友朋急難則傾囊助之無少靳有大僚某  
官吳中罷歸逋官項屬君償之余曰此其家不貧毋庸  
也君卒償之曰既許之矣能無償乎同官某將謁省爲  
責緣君偶與余言及異日大悔之曰庸知其必以是來  
乎吾愧此友矣君爲諸生以授徒自給嘗臥病館中其  
弟爲抱持臥起月餘不倦及官江甯弟年四十餘矣猶  
左右侍奉如曩時君居憂其僕從皆不肯它適以須君  
之出也君內峻而外坦夷人罕得窺其際卽雅相識者

亦謂是政事才巨而惡知君之用心於內者如此先儒  
有言聖門論學必徵諸事論政必本諸心今觀於君益  
信有用之學有本之政卽稍稍發抒而食其利者已遍  
大江南北矧更擴而大之耶君卒之前數月余赴閩藩  
任邂逅於金陵君欬歔爲余言力竭矣筮仕廿餘載訖  
未得一對揚恐一旦溘先朝露無以報

國外有餘憾余以君有經世大略嘗爲故相國蔣公今  
兩江總制陶公言吳中凋敝極矣非得君撫綏不可乃  
天子方允陶公之請將大用君而君已不及待矣方余  
未赴

召時君以書來促行且舉余疇昔所稱陳文恭公熱腸  
卽是仁之語相詰責謂此何時而安處邪乃余出而君  
逝矣悲夫感念疇曩追次其遺言軼事以表君之微尙  
并書以寓之林公其亦有無窮之悲也歟



節婦周呂氏紀略

古無以節婦稱者。婦功而外一循乎禮而已。無才之可見。故亦無節之可稱。節之有聞。蓋自禮教不甞始也。夫禮者。事事而爲之節。所以坊民也。其盛也。人皆範於禮之中。則禮彰而節隱矣。及其衰也。人多軼於禮之外。則節顯而禮微矣。雖然。有節而苦者焉。有節而甘者焉。自非生質之美。而又夙嫻禮教。大氏皆苦節也。君子猶以爲難。而況至性貞摯。一出自然。終其身無尺寸之違乎禮。豈非難之又難者哉。節婦呂氏。年十七歸於周。七月而薨。念其夫未終子職。旦晚起居舅姑。退則閉居特室。

十載不歸甯姻戚罕見其面如此者三十年人皆以爲節也君子曰是禮也禮不可斯須去身節其外見者自有一節之踰則禮虧而不可以成身夫惟安節故能安禮也節婦吾外姑姊內子知之稔不忍其久而湮也故爲紀其略如此云

耐菴文存卷五

善化賀長齡耦庚著

墓誌銘

前湖北光化縣知縣蔣君墓誌銘

道光元年四月永明蔣錦橋給諫前輩出其仲兄敬亭先生行狀委余銘其墓時距先生之沒已四年矣余未識先生而給諫之言則信而可徵者乃不辭而爲之銘按狀先生諱雲容字瑞章敬亭其號也少穎異初執筆學爲文塾師不能易一字年十六與伯兄某同受知於學使姚雪門先生補邑博士弟子員時零陵張光曾齒

與先生齊同時入泮學使稱爲二儒試輒冠其曹辛酉  
以選拔貢成均考充正紅旗官學教習期滿選湖北光  
化縣知縣邑當蓮匪蹂躪之後民氣凋瘵滿目蒿萊先  
生顧之若痼瘕之在身思所以爲綏輯計甫下車卽廉  
訪民間利若弊一意興革氓庶大和未幾河南滑臺告  
警大府檄公防堵民洶洶不自保先生念縣屬老河口  
鎮民物繁夥奸匪易以藏匿遂首先捐俸并勸富紳出  
貲募健勇數十人防範稽查民恃以無恐值歲歉米價  
翔踊豫省飢民流入境內者趾相錯先生牒請平糶上  
官格不行乃籍諸富室畱半年之積餘俱減價出糶又

設廠十餘處。煮糜分餉。流歆之聲。溢於道路。飢民賴以全活。米價亦因是漸平。顧上官終以平糶之請爲不達。時事適有採辦滇銅之役。遂以先生行去。邑之日。士民擁送道左。有相對泣下者。比至滇。復以任內案限遲延。部議罷職。方冀送部。

引見重邀敍用。而先生遂抱病不起矣。先生孝友忠愛。出於至誠。生母張孺人患蟻瘕之疾。醫者以白馬溺合藥。先生恐氣味逆口。嘗而後進。幫臚手自漑滌。不假手婢僕。季弟給諫病幾殆。先生旦夕護視。身不貼牀褥者。逾月。令光化時。迎伯兄至署。公暇輒促坐款話。歡洽如

童時與人交坦懷相示終始如一有不當意輒見辭色旋亦消釋以故人皆憚其嚴而服其誠朋舊患難力可援者必殫竭爲之謀同里候補知縣周圭同年吳大恕歿於京邸先生經理後事至質衣爲償負不以爲德光化密邇襄陽同省北上諸公或迂道造謁雖素未識面必割俸助其行負意氣無佞辭諂色居官未嘗阿意取容其所奮激雖挫辱不少抑居恆不問生產視阿堵物若土苴在官數年服器儉樸如寒素學富經術爲文清矯拔俗無近時圓熟習若先生者可謂文有其行誠於家而形於民者矣然而科不過拔萃位不過縣令而又

爲之不竟其志則先生之蘊而未抒者其可量也夫先生生於乾隆二十九年八月二十一日卒於嘉慶二十二年六月十一日曾祖某祖某父某祖父皆以季弟給諫贈如官配陳氏子二人長啟鉉次啟銓啟銓爲側室程氏出女四人均適名族以某年某月某日葬於某山某原銘曰

先生之文先民是遵而不諧於羣先生之政惠此百姓而上以爲病雖病於上而於己無喪雖戾於羣而於道則醇人見爲先生之屈而余則以爲大伸於虜先生其又何恤夫世俗之紛紛

黃母李恭人墓誌銘

恭人姓李氏山西河曲人贈文林郎諱君澤女封朝議大夫縣增生貞菴黃翁之配而福建福州府同知加知府銜宅中之母也宅中爲余典晉學時所得士其官於閩也有異政余承宣閩中方喜得賢太守爲助而宅中已先奉太君諱歸畱書及狀以銘墓之文爲請其言曰不孝幼承慈訓自成童以還吾母無日不舉先世艱難以激其奮學之志旣筮仕則訓以努力報國勿顧私逮受知大府博寸進則勸以益勵清操勉爲良吏毋倖進自喜已矣今而後慈訓不可得而聞矣痛念不孝學宦



十餘年能稍自樹立者皆吾母之教儻荷賜之文而表章之無俾吾母淑德與其所以教不孝者湮鬱弗彰以重不孝之罪感且不朽先生其哀而許之乎余重悲宅中意又知其狀之無虛美也不敢以不文辭太君之事姑也愉婉篤誠先意承志姑年老久病侍疾年餘無一日懈宅中既授室姑一日顧新婦歎曰諺云久病無孝子汝姑乃能如是吾願新婦他日事姑如姑事我也言已與太君相對涕泣其相夫也順正無違雖小事必稟而行嘗歲祲斗米千錢封翁急人急族黨助貸無虛日太君竭力經營不足輒典簪珥以佐以故歲歉家貧而

封翁猶得行其義於鄉也太君中年屢遭兄姊喪每哭輒病撫其孤如己出然責以習勤自立不姁姁爲姑息愛封翁與從父昆弟同居太君周旋妯娌間推甘讓美茹苦習勞內外稱之其撫僮婢如子女時其衣食勿使饑寒曰彼亦人子也貴賤殊耳忍虐使之宅中之狀云爾余讀之而知其無虛美者則以宅中之服官行政信之也宅中入官以來無一念自爲封殖計其籌辦臺洋軍需拯省城水災釐邵武鹺務艱鉅盤錯皆力肩不辭而無一語自鳴其功伐牒訴紛錯昕夕懟洩無倦容興利除害孜孜如不及故所居民德所去民思詩云教誨

爾子式穀似之。古來稱賢母者必有賢子。觀宅中之賢則太君所以教其子者可知。而太君之賢亦可知矣。太君生乾隆三十二年七月十九日。卒道光十五年三月二十四日。年六十有九。累

封宜人

晉贈恭人子二。長卽宅中。道光壬午進士。改翰林院庶吉士。散館。授福建安溪縣知縣。充道光乙酉科福建鄉試同考試官。歷任侯官縣。閩縣知縣。廈門海防同知。福州南臺海防同知。知府銜。署邵武府知府。次宅仁廩貢生女三。長殤。餘皆適士族。孫二。秉鐸。秉鈞。孫女二。以卒。

之明年十一月某日葬於走馬梁之原銘曰  
不知其母觀其子我銘其幽非湓美昭示來茲耀彤史  
火山峩峩河水湯湯馬鬣封兮允臧宜爾孫子兮緜餘  
慶

韓母婁恭人墓誌銘

恭人姓婁氏浙之會稽人

誥封朝議大夫克峻公之三女原任廣西桂林府知府東憩公之胞妹年十八歸我外舅虛舟公婁故右族饒於財而外舅貧無立錫僅以授徒餬口恭人安之若素時姑氏太恭人已先歿事君舅朝議公惟謹夫兄某援例納貲費不繼恭人質簪珥助之捐並以所餘典田四畝爲堂上甘旨計然食指繁外舅館穀微所入不足贍恭人乃時時就母家食而以所入畱與夫嫂某氏爲饔餼絜饘需夫嫂某故得朝議公歡於娣姒中與恭人尤

相得逮外舅食餼館稍豐恭人乃不復居母家汲爨皆躬親雖盛暑三餐不離竈下冬月汲井水十指俱皸居常所食惟鹽齏飲以梓樹汁搗代茗而所以奉朝議公者隨所需無少缺朝議公年九十一以壽終喪葬費無所出恭人售其所典四畝地得貲事先是太恭人歿未卜地殯於堂至是始合葬焉不數歲而堂燬於火向微恭人四畝地則葬事不克成且罹火厄故外舅尤以此德恭人外舅以己酉

恩科舉於鄉屢下禮闈第遂館京師居停主人以外舅艱於嗣謀爲納媵外舅義不忍負恭人乃寄資斧返之

恭人挈家附糧艘北上兼市南貨助旅費爲竊者所伺尾之行恭人終夜警覺卒無患途次積勞抵京病劇醫者進補劑懂而獲痊恭人體素弱病後益虛而外舅年四十無子遂爲置妾李氏次年又置妾辛氏至戊午李氏生子明繹恭人喜甚珍護如己出丙寅辛氏生子振逾年辛氏歿恭人自撫之保抱攜持十數年如一日戊辰又置妾黃氏生子升凡朝夕飲啖及寒暖衣飾三子者悉惟恭人是資卽諸妾亦惟恭人是賴外舅旣屢試屢躓遂於戊午歲遵例納粟得縣令揀發山西歷署聞喜平遙陽曲諸邑事旋補襄陵調臨汾洊升東路同知

未幾加捐知府。凡外舅宦蹟所至，必與恭人偕事，無鉅細竭力襄助。其次子振，則任襄陵辦賑時所生也。辛氏歸外舅九載不孕，至是有身。外舅語恭人曰：「此必男也。以吾盡心於賑，知之。」故名賑後改振。恭人性簡淡，生平無豔飾。時同僚眷屬多以往還相結納，而恭人終歲不出門。常云：「內政亦一日有一日事。」且我往，卽彼來，多此酬應，何爲？凡親友中無後者，遇其忌日祭祀，必誠必敬。聞有窘者，雖阻於遠道，必思所以濟待，諸妾極寬。諸妾亦循循無稍越。蓋素所感者深也。恭人生於乾隆丙子年四月十六日子時，卒於嘉慶丙子年十月二十七日。



午時卒前一日尙與外舅共飯黃昏後猝患中風遂不起年六十一歲子四人長明繹四川候補鹽大使次振次升俱業儒其季子某則恭人歿後側室黃氏出也女六人長適胡某順天大興縣舉人候選鹽大使次適婁某江西南安府經歷次適孟某順天大興縣舉人候選知縣次適原任平遙縣李某第幾子某次歸長齡皆恭人出最幼者許字原任絳州楊某第幾子某側室黃氏出長齡以恭人既歿之三年始就甥館未及見恭人而側聞懿行大約勤儉恭順動中女則而其大者尤在能逮下此螽斯膠木之詩所以列於二南而爲修齊之要

旨也。既詮次其大概，乃爲之銘曰：

相夫以勤，廣嗣以仁。豈惟仁其身，子孫其世。馨螭螭繩，繩視余此銘。

前陝西按察使樂園嚴公元配張夫人墓誌銘

昔我

世祖章皇帝定鼎之初承

皇太后懿訓著內則衍義明章天下之婦訓以內助之  
要有五曰事夫曰勸學曰佐忠曰贊廉曰重賢昌後之  
要有三曰教子曰勉學曰訓忠爲有家者言之也而國  
與天下實重有賴焉願兼此者難耳夫女子而有士行  
雖鄉閭未嘗乏也而所偶非人則勸學難學矣而或不  
遇遇而小試輒罷則所謂佐忠贊廉重賢云者雖有其  
心亦無以大著其用而況能得之於其子哉若張夫人

者其兼之矣。夫人者陝西廉訪

晉贈方伯樂園先生之配。而鄭州牧仙舫君之母也。先生起家孝廉方正。

廷試時三省教匪方熾。

睿皇垂問及之。先生手草數萬言以進。

上爲動容。嗟賞。後一一如所策。歷官秦中。幾三十載。所至多教匪出沒之區。先生悉力捍禦。猶以餘暇勸農迪髦。使其民幾不知有寇患。而其教漢中以紡織也。女婦皆進謁夫人而請事。歡若一家。然至乃羽檄星馳。風鶴皆警。先生則儒服從戎。不避艱險。雖林箐深密。罔弗躬

親授勲。匪直居民倚以爲安。主兵者亦往往降色辭。諮  
籌策用是罄蹟。

上徹洊陟崇階。而使先生無內顧憂。得一意辦賊。以鎮  
撫吾民者。則夫人佐忠之力也。於虜士大夫幸際承平。  
從容宣力。猶或縈情家室。喪厥生平。矧乃崎嶇戎馬之  
閒。而能一無繫戀。累月經年。與賊追逐。若忘乎其身之  
爲文職者。先生誠忠矣。如夫人者。抑亦可不謂賢乎。及  
仙舫官河南。河南大吏知爲先生子。無不傾心倚重。遇  
繁劇缺。及河工大役。必以畀其擢鄭州也。以夫人春秋  
高乞歸養。大府不許。適河洩祥符而汴城地低下。水幾

冒城大府檄仙舫董其事時夫人病矣且諄諄勸以  
欽工重大當竭力報效毋以我爲念猶當日佐忠意也  
仙舫之居贈方伯公喪也夫人出其簪中金三千有贏  
命建家廟置義田葺書院并增生徒膏火曰此汝父意  
也於庠茲非所謂贊廉勸學重賢者乎抑豈一家之私  
已乎夫如是而後爲能訓忠如是以訓忠而後佐忠爲  
無忝記不云乎孝子之身終終身也者非終父母之身  
終其身也婦之於夫猶是也於庠夫人其知此義矣夫  
人生於乾隆二十一年二月十五日子時以道光二十  
一年九月十六日丑時卒於河南鄭州官署年八十有

六以某年某月某日葬於某鄉某原子孫世系已具贈  
方伯公誌爲之銘曰

伯也執爰婦勉其夫卻鮐勸廉母教則嚴是父是子疇  
克兼此惟張夫人福鍾一身匪福斯厚繫德斯茂佐忠  
訓忠家榮

國崇用闡

帝訓以章婦順內則孔明萬葉流慶

墓表

前工部都水司郎中李漪園先生墓表

代

今天子受璽初元

特恩開科大試天下士于禮部。擇朝臣中有學行聲望爲一時宗仰者董分校事。而吾師李漪園先生以工部都水司正郎與其選。榜發多寒畯。宿儒士論翕然而亦以不才忝出先生門下。初先生以甲辰捷南宮成進士。第三人名譽蔚起。士之竊議者。僉謂如先生之才之學。致身清要。庶無愧乃淹滯部曹十載不調。至乾隆乙卯始一被



命典楚北試。逾年又有春闈之役。是時文枋疊操先生感激。

主知。益自振勵。漸得士。而所學者素妍媸。到眼立辨。故取文皆有程式。士之經其品題者。亦類能矜奮自立。不染於流俗。部大吏稔其賢。有劇務輒畀先生。先生孜孜弗少懈。嘉慶二年。

京察屆期。大吏擢先生上考。旋蒙

簡記。蓋駸駸乎大用矣。故事部正郎例用監司太守。先生齒方強仕。年力大有爲。而又資望深重。受知於大吏。見知于

天子及此時展厥底蘊事業甯可量哉而先生則遽逝矣悲夫及先生門僅載餘請業無多日猶記侍坐時語及當世人物先生意氣豁如不輕許可有不當意輒大聲叱其名風力矯然如此今距先生之歿已廿年其孤某自西口來以墓道之文相屬追維提命誼不獲辭謹據所知者敍而歸之

先考通奉府君墓表

先考通奉大夫建寧府君既沒之二十有八年先妣嚴太夫人以壽終越明年乃展先大夫之墓而祔葬焉於是不孝松齡等泣而言曰於虘不孝等今乃以哭吾母者表我先大夫也先大夫諱啟曾字輔周建寧其號也先世浙東人高祖上振公以銓臬司獄官湘中遂籍善化曾大父梅九公諱士英大父用賓公諱國華皆早世曾大母馮大母陳世以節孝著自上振公之謝官也治刑家言叔曾大父雅菴公以其業顯先大夫從之學甫踰冠輒爲州郡上客以此衣食其家者三十年治事偶

暇輒取史鑑古文尋繹洛誦或歲晚歸家亦手書不輟  
夜闌人靜誦聲恆琅琅然見後進能力於學者誘掖之  
恐不至蓋生平意嚮未嘗一日不在學而少而孤貧不  
能不出其身以爲尸饔計逮後食指日繁百計屏當僅  
乃克給而以養以教卒俾不孝等稍稍有以自見於世  
者先大夫之隱志亦太夫人有以成之也先大夫律已  
嚴尤愆於家政不孝等成人以往繩督恆如幼冲時自  
飢驅南北不能一日安於家而坦然無內顧憂恃有太  
夫人也太夫人嘗語不孝等曰汝父失怙時纔十餘歲  
吾歸汝家汝父猶未冠而天性嚴厲雖暗室無惰容友

愛汝叔父課責不少貸有過未嘗不撻也汝輩若不勤志嚮學汝父其汝貸乎長齡初補弟子員太夫人肅衣簪爲先大夫賀先大夫謝曰此汝力也胡我賀歲丁卯長齡熙齡同領鄉薦先後成進士太夫人馳諭不孝等曰爾父在日每痛念兩世苦節未獲顯揚不幸齎志以歿未亾人常懼無以報汝父於地下今庶幾追余責矣然移孝作忠遠大之事方自今始爾等其益勉之母令余無以終爾父之託今

上卽位之元年長齡以

特恩補郡守太夫人慮其弗任也諭之曰爾父佐幕廉

耐菴文存

卷五

墓表

六

家雖貧不以賤直市官物懼累人也嘗館某太守所守與學使者有舊密詢家中有無應試者乎則對曰無是歲壽齡試卷已入選矣旋以微疵黜汝父處之夷然也其治刑也遇罪名出入輒躊躇竟日夜不能下筆曰吾以求吾心之所安而已嗚呼佐治且然矧汝自爲之邪長齡等泣誌之不敢忘雖德薄能鮮而歷官中外二十餘年幸免隕越以貽罪戾者不敢墜太夫人之教上玷先大夫之素行也先大夫美鬚髯豪於飲意氣豁如而默坐澄思常若有無窮之慮人莫能窺也生於乾隆十七年壬申歲九月初八日卒於嘉慶八年癸亥歲正月

十三日春秋五十有二葬於善邑新開鋪天平山之陽  
丁山癸向太夫人同邑朝銘公女儉而勤慈而肅戚黨  
見者咸愛慕而敬憚之善用人能得僕姬心無敢絲髮  
欺生於乾隆十九年甲戌歲八月二十六日卒於道光  
十年庚寅歲十一月十九日春秋七十有七方太夫人  
之病劇也昕夕端坐歷四旬無稍傾倚室中整潔如未  
嘗病焉者人皆以爲難子八長松齡次椿齡次壽齡先  
卒次文齡次長齡次熙齡次殤次桂齡長齡嘉慶戊辰  
進士歷官江甯布政使司布政使熙齡甲戌進士歷官  
京畿道監察御史湖北學政出爲叔父念曾後桂齡道

光壬午科優貢授桂陽州儒學訓導女一適同邑楊汝南孫十三人曾孫三人長齡通籍之明年恭逢

國慶得以贈封其親上及祖考妣其後疊遇

覃恩頻膺錫典及備藩江甯於是先考晉贈通奉大夫江甯布政使司布政使母晉封太夫人曾大父母大父母皆贈如其官

寵命渥被於

兩朝褒崇遠逮於三世顯懿隆鑠鄉里稱榮而孰知先大夫早自劬也先大夫病革時語太夫人曰汝享兒孫福母我念恨我不及見耳雖然茲福固宜汝享也蓋吾



家累世積德未曜而先大夫自信一生無過行有培而益之無剝而損之天道神明鑒觀不爽故預以一言慰太夫人數十年之苦心而徵應之緣如符斯合嘉慶庚午長齡典試粵西道經里門得一登堂起居太夫人厥後視學山西及守南昌兩奉安輿焉自山東移江甯以改近陳情

上未之許也無何熙齡督學武昌距長沙僅一湖隔耳太夫人感且泣曰

上恩厚矣吾衰年能有幾而敢遠離先隴乎家居被服儉素一如未貴時曰此汝父意也吾祖姑吾先姑皆未

嘗坐享一日之榮。吾何心侈然自奉哉。自先大夫之歿。太夫人所以持家教子訓諸孫曾者。益謹於初。蓋無時不以先大夫之心爲心。故無時不以先大夫之教爲教。而譴劣如不孝等。前猶恃有太夫人曉夜提撕以紹述先大夫之遺訓。今已矣。大懼來日方長。弗克終自樹立。以竟先大夫與太夫人未竟之志。故敢揭其徽言。嫩行卓卓大者。表於阡。俾我後世子孫。無忘先世艱難。而困而能亨。卒以拔起於單寒之中者。由來有漸。庶幾懣感興起。思益光而大之。於以繼承。勿替。是則先大夫與太夫人之所屬望也夫。